



آداب المريد

مؤلف حقیقت آموزی

عارف اکبر غوث الواصلین شیخ محی الدین عربی

قدس الله سر

FAKULTES

ROMANESQUE

مترجمی

Celal Okturk

Yahya Kemal

مختار

1 / 1

عارف نظارت جلیله سنک فی ۱۰ تیسان سنه ۳۰۹ تاریخلی

۱۷۶۶ نومرولی رخصتنامه سیله طبع اولمشدر

استانبول

(محمود بک) مطبعه سی — باب عالی جوارنده

ابوالسعود جاده سنده نومرو ۷۲

۱۳۱۰

آداب المريد

مؤلف حقيقت آموزی

عارف اکبر غوث الواصلین شیخ محی الدین عربی

قدس الله سره

ISTANBUL

Y. İslâm Enstitüsü Kütüphanesi

Yıl No. 330

Kitap No.

مترجمی

مختار

معارف نظارت جلیله سنک فی ۱۰ نیسان سنه ۳۰۹ تاریخلی
و ۱۷۶۰ نومرولی رخصتنامه سیله طبع اولمشدر

استانبول

(محمود بك) مطبعه سی — باب عالی جوارنده ابوالسعود

جاده سنده نومرو ۷۲

۱۳۱۰

بسم الله الرحمن الرحيم

هدایت آفرین مطلق تعالی شانہ حضرت تلیتینہ
فاتحہ خوانی حمد و ثنا و خاتم النبیین توحید آموز
لا اله سواہ علیہ صلوٰۃ الالہ افندمرہ عرض
تحيات لا تحصى و ترضيه کويء ال واصحاب
هدایت نما ودعاى خلافتیناہ عدالتفرمادن صکرہ
خامہ ران عرض مرام اولورم کہ رهنمای محققین
مربی عارفین وارث علم نبی شیخ اکبر محی الدین
عربی قدس الله سرہ حضرت تلیتینک { مالا بد منه
للمريد { اسميله دانشخانه کائناتہ یادکار ایلدیکی
رساله مختصرہ نک دین و دنیا جہ برچوق نصایح
و وصایای نجات انتہائی شامل واستفادہ عمومیه بی

کافل کورنمسی حسبیله عهد ہمایون ملوکانہ سی
مطلع الانوار فیوضات خدا و مجلای تجلیات فوز
و ہدی اولان خلافتما ب اعظم ولی نعمت بیمنت
افخم حامی دین مبین و مؤید شرع متین پادشاہمز
الغازی «عبد الحمید» خان ثانی لازال محفوظا بالسبع
المثانی افندمر حضرت تلیتینک سایہ موفقت سرمایہ
خلافتیناہیلرندہ دستکاه آرای انتشار اولان
آثار دیانت پروانہ یہ علاوۃ لسان عذب الیاب
عثمانی یہ بالترجمہ آداب المرید عنوانیلہ طبع و نشرینہ
جسارت ایلدم . والله الہادی الی الصراط المستقیم

بسم الله الرحمن الرحيم

الحمد لله رب العالمين و صلى الله على سيدنا محمد
وعلى آله اجمعين

ای مرید ارشادخواه . طریق رشد و سداده
 سالک اولمق ایستیان بر مریدك برنجی درجه ده
 محتاج اولدینی اعتقاد و عملك نه دن عبارت
 اولدینی بندن استکناہ ایلدك ایشته بو رساله یی
 سؤالک جواب و رهنمای صدق و صواب اولمق
 اوزره تحریر و تألیف ایتدم . والله ولی التوفیق



﴿ فاتحه اعتبار ﴾

ای سالک راه طلب و مشتاق جمال حضرت رب .
 مولای متعال حضرتلری بزی و سنی طاعت سبحانیسته
 موفق بیورسون و همیشه رضای ربانیسنه مقرون اولان
 ایشلرده قوللانسون . معلومك اولسونکجه جناب
 واجب الوجودك بزه قریبیتی انجق تعریف و تبیین آلهیسیله
 بیانور . الحمد لله بو حقیقتی بزه بیلدیردی [١] و پیغمبران
 عظام علیهم الصلاة والسلامی بعث و ارسال ایله سعادت
 ابدیهیه واسطه وصول اولان یوللری کوستردی . بزه
 رسل عظامك تبلیغات جلیله سنی آمنا و صدقنا دیهرک
 حسن تلقی و قبول ایلدك . شمدی یالکز ایمان ایتدیکمز
 اوامر الهیه و احکام شریعت احمدیه یی انفاذ و استعمال
 ایتمك وظیفه سی قالدی . ایمدی ای مرید سکا واجب

[١] قرب الهی ونحن اقرب الیه من جبل الورید . ونحن
 اقرب الیه منکم ولكن لا تبصرون . و امثالی نصوص قاطعه
 قرآنیه ایله ثابتدر . مؤلف حقیقت آمور قرب ربانییه (الحمد لله)
 کلمه جلیله سیله رمز و اشارت بیورمشدر . نهر رمز لطیف ،
 روشن نظران عرفانه معلومدر .

اولان شيلرك برنجيسى خالق لايز الكى توحيد [٢]
 وحق الهيسنده دينلوب سويلنمى جائز ولايق اوليان
 شيلردن ذات اقدسنى تنزيه وتمجيد ايتمكدرد .

[٢] توحيد لسان شرع مينده معبودى امر عبادتده افراد
 و بونكله برابر ذاتاً و صفاتاً و افعالاً وحدتنى اعتقاد ايتمكدرد .
 قال الله تعالى قل انما يوحى الى انما الهكم اله واحد . وانما الله اله
 واحد . الله لا اله الا هو . بعض محققين بيوردى كه توحيد اوج
 قسمدر برنجى قسمى جناب حقه ذات الهيسنى توحيديدر كه كندى
 وحدانيت مطلقه سنه شمول علمدن و (الهكم اله واحد) قول
 جليله احديتنى اخباردن عبارتدر . ايكنجى قسمى حقه خلقى
 توحيديدر كه بوده عبد مؤمنك موحد اولسنه حكم الهيسنك تعلقندن
 و قلب مؤمنده توحيدى خلقندن كنيتدر . اوچنجى قسمى خلقك حق
 توحيديدر كه عبدك الله تعالى حضرتلرينك واحد اولديغنى بيلوب
 اعتقاد ايتسى و يا آيات جليله قرآنیه سندن استنباطاً برلكنى اعتقاد
 و اخبار ايلسى و يا خود چشم قلبى اوزرينه رؤيت الهك غلبه ايتسيدر
 ايمدى جناب حقه بر اولديغنى اعتقاد و يا دليل نظرى ايله استدلال
 ايدن و يا خود خلقدن غافل اوله حق درجه ده دیده بصيرتى اوزرينه
 رؤيت حق غالب اولان كيمسه به موحد اطلاق اولنور و بوتقدیرجه
 توحيد اعتقادیدن بهره مند اولان كيمسه به مؤمن . و توحيد
 استدلالیه موفق اولانه عالم . و رؤيت قلبیه ايله قرير العين عرفان
 اولان بختيار ازلی به عارف بالله دنيلور . بونلردن برنجيسى توحيد
 عوام . ايكنجيسى توحيد علما . اوچنجيسى خواص صوفیه عارفینك
 رؤية الله . مقام شهود . مقام حضور . تعبير ايتدكلرى توحيد
 حقيقت انقادرد .

توحيد ايجون (قل لوكان فيهما آلهة الا الله لفسدتا)
 نص مبينى اساس متيندر [١] زيرا ذات باريدن بشقه
 اله بولنمش اولسه ايدى اختلاف ارادات حسبيله وجوداً
 و تعذراً بر فعلك و قوعى ممتنع اولوردى .

اي مرید پاك طينت سن شرك ايدن كيمسه به عطف
 نظر مبالات ايمه واحدیت الهیه ايجون دليل كتيرمه
 قالدشمه ؟ زيرا مشرك « و لئن سألتهم من خلق السموات
 والارض ليقولن الله » قول الهيسى وجهله سنكله برلكده
 وجود خالق لايزالى اثبات و تسليم ايدىيور و سندن زائد
 اوله رق شريك بارى بولنديغنى دعوى ايليور . دعواى
 باطلنى اثبات ايتك يعنى زياده قيلديغنى شريك ايجون دليل
 كتيرمك اكا دوشرد .

[١] تفسير شريفى اى اكل رسل مشركينه دى كه اكر پرده
 وكوكده الله تعالى حضرتلرندن غيرى تدبير و تصرفه قادر الهلر
 بولنمش اولسه ايدى زمين و آسمان فاسد و تباه و امور كائنات
 متشتت و پريشان اولور ايدى زيرا اكر الهه نك اتحاد مقصد
 و مرادى فرض اولنسه بر مقدوره بر چوق قدرتك تعلق و طريائى
 لازم كله جك ايدى بالعكس اختلافى فرض ايدلسه مقدور تعويق
 دوشوب وجوده كلز ايدى بناء عليه مدبر عالمك بر اولمى لازمدر كه
 اوده الله تعالى حضرتلريدرد .

توحيد بخشنده بوقدر معلومات سكا كفايت ايدر زيرا
وقت يك قيمتداردر اني ضايع ايلمكه كلز . عقل ايسه
سليمدر سلامتكن اخلاالى جائز اولمز .

تنزيه مسئله سنه كلنججه بومسئله زمانمزده (يعنى مؤلف
حقيقت پرورك زماننده) ظاهر وغالب اولان طوائف
مشبهه ومعطله ومجسمه دنطولايي سنك ايچون مسائل
مؤكده معتنا بهادندر .

ايمدى اى قرداشم بحث تنزيهده (ليس كمثله شئ)
يعنى جناب اللهك مثل ونظيرى يوقدر (قول جليلنى نقطه
نظر اعتقاد آيله امر تنزيهده بوقول الهى . سكا كافيدر
بو آيت جليله نك ضد وعكسى اولان هر وصف زائد .
انك حكم حقيقت پرورينه لايق اولميان شئيئه مردود
وعانددر .

بناء عليه امر تنزيهده بوقول الهيدن زياده برشى آرامه
و نظر اعتقادىكى بونقطه حقيقتدن آيرمه . بومبحث
قدسيده (كان الله ولا شئ معه) حديث شريفى دخى
آرايش صحيفه اعتباردر علمائى اسلاميه بو حديث شريفه
(وهو الآن على ما عليه كان) جمله حكمت بياني علاوه
ايلديلر .

ايمدى اشبو حديث شريفك مدلول جليلندن
اكلاشلا دينى وجهله جناب واجب الوجود عالم موجود
دكل ايكن نصل اوصاف جليله آيله متصف ايديسه كائناتى
يارا تدقدن صكره ينه اوصفات مقدسه آيله متصفدر يعنى
ازلا موصوف اولدينى اوصاف اقدسدن فضله كائناتى
يارا تمسندن طولايى ذات الهيسنه هيچ بروصف وصفت
راجع و زائد اولمىدى . تعالى الله عما يقول الظالمون
علواً كبيراً .

حاصلى كرك عالم و كرك ماسواى حق دنيلان
هر بر شئ مستور پرده عدم ايكن تنزيه بارى حقنده نه
اعتقادده بولنيور ايسهك وجود كائنات آيله برابر ينه او
اعتقادده بولك .

سكا واجب اولان شيلردن بريده توحيد و تبليغه
دائر اولوب كلام عربك شيوه استعمالنه كوره تشبيهى
ايهام ايدن آيات و احاديث شريفه نك و ياخود مهبط
وحى الهى اولان سائر انيادن صادر اولان كلمات
منيفه نك معانيسنى علم الهى به تفويض ايدرك جمله سنه
ايمان ايتمكل ككدر؟ زيرا بو آيات و كلمات بديعه المأل .
مزايائى مقدسه سنى اكلايانلره وحى وانزال بيورلمشدر .

(لیس کمله شیء) تنزیه الهیسی فوقنده ایسه هیچ
بر منزّه جناب واجب الوجودی تنزیه ایده من . زیرا
حق جل و علا ذات اقدسنی کندی شان عظمت والوهیتنه
لایق اولان بو قول جامع المعانی ایله تنزیه بیوردی .
بناءً علیه امر توحید و تنزیهده مقدمات مبسوطه بی نقش
صحیفه اذعان ایت و کافه رسل و انبیاء عظامه و انلرک
طرف حقندن کتیردکلری و خبر و یردکلری اوامر
و احکامه حاصلی بیلوب بیلمدیکک تبلیغات نبویه یه ایمان
آیله و جمیع صحابه کرامک محبتیه اتصاف و عدالتلرینی
اعتراف قیل . حقارنده طعن و جرحی موجب سوزلرده
بولنه . انلری تنزیل مبین الهی و لسان حقیقت بیان
رسالتهنهای نه صفت و مزیتله تفضیل بیورمش ایسه
انکله بالا کتفا ایچلرندن برینی دیگرینه تفضیلدن صاقین
و جناب خالق مستعانک و پیغمبران ذیشانک تعظیم
بیوردکلری شعائر و ذواتی مشمول نظر تعظیم و احترام
قیل [۱] و طریقت جلیله صوفیه ارباب حقیقت نصابندن

[۱] ومن يعظم شعائر الله فانها من تقوى القلوب لكم فيها
منافع الى اجل مسمى آیت جلیله سننده مفسریندن علامه مغرب
شیخ احمد عجیبه رحمه الله علیه کندی تفسیرنده سلاطین اسلامیه بی

مروی اولان کلمات و احوالی و انلردن وقوعنی کوروب
و ایشیدوبده حوصله علمک صیغشدیره مدینک آثار
و اقوالی دخی تسلیم ایله . ای مرید هدایت خواه جمیع
خلقه حسن ظن ایتکی اعتیاد ایت . انلره سلامت
وجدان و سینّه صاف ایله معامله قیل و اخوان مسلمینه
عن ظهر الغیب دعا خوان اول . استغناپروران فقرایه یعنی
سالکان راه خدایه مقتدر اولدینک قدر خدمت و معاونت
و اولیاء الهی و کافه اماکن مقدسه و مبارکه و جوامع شریفه بی لازم
التعظیم شعائر الهیه جمله سندن اولدیننی بیان ایلشدر .

حکیم ترمذی قدس سره نوادر الاصول نام کتاب فوائد
نصابنده خامهران تحقیق اولوب دیدی که جناب واجب الوجودک
روی زمینده درت اثر قدسیت شعاری واردر بری قرآن عظیم
الشاندرکه کندی کلام بدیع بی مدانیسیدر دیکری کعبه الله
العیلادرکه طلعتسرای نور وقار یزدانیسیدر دیکر بریده سلطان
عدالت شاندرکه ظل هیبت و جلال ربانیسیدر دردنجیسی مؤمندرکه
ولی سبحانیسیدر انتباهپروران مؤمنین و مشتاقان جمال رب العالمین
قرآن کریمک لطائف حکمتنه امعان نظر عبرت و بیت الله الحرامدن
پرتو افشان اولان نور وقار الهیسنه حصر نظر بصیرت و سلطان
مؤمنیندن متجلی اولان ظل هیبت و عظمت ربانیه سنی ملحوظدیده
تعظیم و حرمت و ولی الهیسنک صدرندن پارلایان پرتو جلال
ربانیسیله تنویر باصره حسرت ایدرک بو دنیاچه کسب حضور
و روحانیت ایدرلر . انتهى

ایت . انلره خدمت ایتدیکندن طولایی کندی نفسکده
بر کونه فضیلت و مزیت تصویرایتمه . بلکه سنک خدمت
و معاونتکی قبول ایتدکاری حیثیتله منت و فضیلتی انلرده
کور . فقرانک هر درلو بار کلفتلرینی دوش همته آل .
اذا و جفالرینه قاتلاک . طور و مشر بلرینه قارشو
صبر و تحمل خصوصنده (ان الله مع الصابرين) حکم جلیلی
پیش نظر اعتناده طوت .

ذکر اللهدن . تلاوت قرآن کریمدن . حق یولندن
صائمش اولنلری ارشاددن . امر بالمعروف ونهی
عن المنکردن . طارغینلقله یکدیکنندن آیرلمش اولان دین
قرداشلر یمزک ارالرینی بولوب تألیف و اصلاح ایتمکدن .
صدقه یه تحریر و تشویقندن . حاصلی خیره دلالت ایدر
سوزلردن بشقه هر درلو فائده سنر لقر دیلردن کف لسان
ایله و سالک اولدیغک طوغری یولده سکا یاردم ایده جک
موافق ارقداش بول . زیرا پیرایه دار جوهر ایمان اولان
کیسه مؤمن قرداشنک معاونتیه قوت بولور . اهل
حقیقتی منکر و سنک فکر و مسلاک حق جویانه که ضد
و منافق اولان کیسه سنک صحبتندن صاقین و هر حالده

سکا حق یولنی کویستره جک بر مرشد کامل آرده و بوتشیده
طوغری یلغی التزام ایت . زیرا طوغری یلق مریدک شعار
مخصوصیدر . تحقیق هر هانکی مرید حق یولنده طوغری یلغی
التزام ایدرسه جناب هادی مطلق کنیدیستی الذدن
طوته جق و مقصدینه ایرشدیره جک بر مرشد کامله موفق
ایدر و حقنده هر بر شیطانی خیری الهام ایدیچی برر ملک
قیلر . طوغری یلق برا کسیر اعظمدرکه هر هانکی شی
اوزرینه قوناسه اوشیئک عینی تحویل و اصلاح ایلر
یعنی باقر اوزرینه وضع اولنسه انی التون ایدر .

سکا اهم والزم اولان مهماتدن بریده لقمه حلال
ارامقدر زیرا طریقت جلیله محمدیه نک اساسی مال حلالدر .
عماد دین لقمه حلال اوزرینه قائمدر .

ای مرید . هیچ برشی ایچون خلقه تحمیل بار کلفت
ایتمه و کیسه یه ثقلت و یرمه و کولکلی غفلت اولومیه
اولمش اولنلردن نه کندی نفسک ایچون نه ده بشقه سی
ایچون لطف و احسان قبول ایتمه .

قز انجکده . سوزکده . جمیع حرکاتکده . ورع
و تقوا یه ملازمت ایله مسکنجه . ییوب ایچه جکجه مائل

وسعت ورفاه اوله زیرا مال حلال اسراف و ابداری قبول
و احتمال ایتمز .

شورانی محقق بیلکه شهوات دنیویه نفوس
بشریه ده کولکشنجه پک کوچ قوپاریله بیلور . بناءً علیه
بو تاجر بتکاه عالمده مرید وسعت و راحت آراماملیدر .
طعامی تقلیل دخی جمله مهماتنددر ، زیرا آزیماک
قلبه فرح ویرر . طاعات و عباداته شوق و رغبتی آرتدیرر .
تبلیکی کیده رر .

ای طالب حق کیجه کوندوز اوقاتکی عبادات
و طاعات ایله تعمیر و تنویره چالش خصوصیه رب
کریماک حضور صمدانیسنده ال باغلیوب طور مق
ایچون شریعت غرای احمدیه نک سنی دعوت ایلدیکی
ساعتلرکه صلوات مفروضه یه مخصوص اولان بش وقتدر
اوقات مذکوریه کوزلجه حفظ ایله وانلرک اره سنده کی
اوقاتی اعمال صالحه و نیات خیریه ایله احیایه همت ایت .

اگر صنعت صاحبی ایسه ک بر هفته کچینه جکفی بر
کونده قازانمغه چالش . خلفای عباسیه دن هارون الرشیدک
اوغلی احمد سبکی کی که یالکز جمعه ایرتسی کونلری

عمله ک ایدرک بر کونده قزاندیغی شی ایله بر هفته کچینیر
ودیکر الی کوتی طاعات و عبادات ایله کچیریر ایدی [۱]
صبح نمازینی قیلدقدن صکره کونش چیقنجه یه قدر
نماز قیلدیغک یردن آیرله . ایکندی نمازینی ده قیلدقدن
صکره کونش غروب ایدنجه یه قدر نمازگاهکی برافه
بویکی زمان فیض رسانده خضوع و حضور ایله ذکر الله
مداوم اول . اوکلهدن ایکندی یه وغروب بدن یاتسویه
قدر یکر می رکعت نماز ادا ایدرک حضور الهیده طور مق

[۱] مؤلف حقایق پرور عارف اکبر قدس الله سره الاظهر
مشارالیه احمد سبکی قدس سره حقنده خامهران تحقیق اولدیغی
مبحثده بیوررکه یوما من الایام طائف بیت الله الحرام اولدیغی حالده
اوکوم صره بر جوان بدیع الجمالک مشغول طواف اولدیغی کوروب
امعان نظر ایتدیکمده اهالی و مجاورین مکهدن اولدیغی و هیئتنده
اثر سفر کورنمائی جهته یکی کلش غربادندده بولمادیغی تیقین
ایدرک بونک ارواح متجسده دن اوله جفنه حکم ایلدم و بومثللو
ارواحدن برینک اوزرینه حیاته کیلردن برینک نظری بلافاصله
منعطف و ممتد اولنجه ساحه ظهوردن غائب و نهان اولسی ممکن
اولدیغی بیلدیکمدن انی نظر کا همدن آیرما مفی التزام ایتدم جوان
مذکور اشواط طوافی اکمال ایدنجه حجرا سعد پیشگاهنده طوردی
ووجه تابناکنی نم طرفه چویردی بنده کندیسنه تقریبه سلام
ویردم و کیم اولدیغی صوردم احمد سبکی یم دیدی . جمعه ایرتسی
کونلری ایشلیوب دیکر کونلرده اشغال دنیادن فراغت سببی

و بوضو رتله جناب حقى ذكر ايتكم فضيلتني الدن قاجيرمه .
 اول نهاردده و اوكله دن اول و اوكله دن صكره و ايكنديدن
 اول و اقشام فرضدن صكره دردر ركعت نمازه دوام الله .
 ياتسو فرضنى ادادن صكره هرايكى ركعتده سلام و یرمك
 شرطيله اون ركعت نافله و اوچ ركعت صلاة و تر قيل .
 اويقو غلبه ايتكم سزین اويومه . اچيقمه دقچه يكم يمه .

سؤال ايلدم جواباً دیدی که جناب فاطر مطلق سموات و ارضینی
 يوم احددن بدأ ايله جمعه كونه قدر يعنى التى كونده خلق و ابداء
 ويدنجى كوفى يعنى يوم سبته شان و جلال الهيسنه لايق
 صورتده استوا بيورمديمى ؟ اوت ديدم اويله ايسه جناب قادر
 لايزالك قوللرى ايجون حكمت نماي ايجاد كائنات اولدينى
 كونلرده قوللركده ذات الوهيتنه طاعت و عبادتله اشتغال ايتلرى
 واستوا بيوردينى كونده ده كندى نفسلريچون چالشملى موافق
 دأب عبوديت دكليمدر ؟ ايشته بو حكمته مبنى بنده يالكز جمعه
 ايرتسى كونلرى امر معيشتله اشتغال و ديكر كونلرده مساعى
 و اوقاتى عبادت مولايه حصر و ابدال ايلر ايدم جوانى و يردكدن
 صكره بشقه ديه جككز يوغيسه مساعده ايديكز ديميله بنده
 ملاقات واقعه دن طولاي كنديسنه بيان تشكرله برابر شريطه و داعى
 ايفا ايلدكدن صكره اوزرنده كي نظريمى رفع اندر ايتمز چشم ظاهر
 بيندن نهان اولدى مشار اليك سبتي لقبيله اشتهار ايتسنه سبب
 شو صورت معيشتيدر . نفعنا الله ببركاته

كيديكك لباسى مجرد صغوغك و صيجاغك تاثيرندن
 وجوديكى اسيركه مك . و عورت محانى اورتمك و الحاصل
 عبادتدن سنى منع ايدم جك هر درلو حال و اذاي دفع
 و ازاله ايتكم نيتيله كى . اوقور يازار طاقدن ايسهك
 مصحف شريفه باقهرق اوقومق شرطيله كنديكه قرآن
 كريمدن هر كون ايجون برورد مخصوص اتخاذايت .
 قرآن عظيم الشانى اوقويه جغك زمان مصحف شريفى
 كوكسكه قارشى صول الكله طوت . و كوزك مصحف
 شريفه ناظر اولدينى حالده صاغ الكى قرآن كريمك
 حرفلرى اوزرينه يوروت . و اوقوركن كندى نفسكه
 ايشتديره جك درجه ده سسكى يوكسات . و فرقان كريمى
 ترتيل ايدرك يعنى عجله سز آهسته آهسته معانى
 جليله سنى دوشونهرك اوقو . سؤال رحمت سبحانيه يي
 مستلزم اولان آيات جليله ده رحمت الهييه يي يالواره رق
 ايسته . شاين اعتبار اولان آيات كريمه دن دخى عبرت
 آل . حاصلى هر بر آيت جليله استعاذه دن . استغفار دن
 وسائر دن هر نه حكم و حكمته دلالت ايلرسه مقتضاي
 نجات احتواسنجه معامله قيل . مؤمنلرك صفتلرينى

متضمن اولان آیات جلیله بی او قود یغکده ؛ بو صفتلردن کندکده موجود وسندن مفقود اولانلری تفکر ایله . تا که بوصفات مدوحه دن سنده موجود اولانلری ایچون قلبکله الله تعالی حضرتلرینه شکر ایده سن و اولمیانلریچون تلافی مافاتنه یعنی انلرله اتصافه چالیشه سن ؛ منافق و کافر لرك صفتلرینی مبین اولان آیات جلیله بی او قود یغکده دخی . كذلك صفات مذمومه مذکورده دن سنده برشی اولوب اولدیغنی دوشوک . انلردن سنده برشی وار ایسه رفع و ازاله سنه چالش ؛ یوقسه باری تعالی یه حمد و شکر ایله . سکا لایب اولان شیلردن بری ده جمیع اوقاتده نفسکله حسابلاشمق و کولکله کلان خاطره لره رعایت ودقت ایتکدر . دائماً اللهم دن حیا ایتکی قلبکله عادت ایتدیر زیرا سن حق دن اوتانورسه ک عندالله مذموم اولان خاطره بی کولکله یرلشیدر منرسن و هر وقت قلبکی رضای الهیسنه مخالف حرکت میل و اصراردن منع ایدرسن . بنم بر شیخم و ارایدی که کوندوز و قوعبولان افعال و اقوالنی بر صحیفه یه یازاردی ؛ کیجه اولنجه او صحیفه بی کوزی اوکنه قویه رق آنده یازیلی اولان حرکاتی اوزرینه

نفسنی محاسبیه چکردی . یعنی اقوال و افعالی استغفاری موجب ایسه طلب عفو و مغفرت ؛ توبه بی مستوجب ایسه توبه و انابت ؛ حمد و شکر مقتضی ایسه شکر و محمدي ؛ ایدردی بن ایسه شیخمدن فضله اوله رق خاطره لریمی ده قید و تحریر ایدیورم .

سکا اهم و لایب اولان امور دن بریده اوقاتکی بوش و عبث یره کچیر مامکدر یعنی ایچنده بولندیگ هر وقتی کوزت . سنی او وقتده شریعت نه عمل و عبادته دعوت قیلدیسه انی ایفایه مسارعت ایت . اگر فرض وقتی ایسه هان فریضه بی ادا قیل . اگر سنت و نافله وقتی ایسه انی ایفایه چالش و اگر مباح وقتی ایسه صنوف خیراتدن جناب حق سکا مباح قیلدیغنی شیلرله اشتغال ایت .

الله تعالی حضرتلرینه یقین اولغنی موجب اولان اعمالدن برینی اجرا یه باشلا دیغکده او عملدنصکره بشقه عمله موفق اوله جق مدت یاشایه میه جغکی فرض و تحیل ایله یعنی او عمل مشروعی رب کریمک دیوان عظمت و کبریاسنه کیره بیله جکک اک صوک عبادتک اولدیغنی تصور قیل . هر عملده بویله یپارسه ک عبادتکده اخلاص ایتمش اولورسن زیرا قبول اعمال اخلاصه متوقفدر .

سَنَك اوزرينه لایب و مهم اولان اموزدن بریده دائماً
 طهارت اوزره بولمقلغکدر هر نه وقت آبدستک بوزیلور
 ایسه همان آبدست آل . هر نه وقت آبدست آلیرسهک
 ایکی رکعت نماز قیل . مکرکه آبدست الدیغک وقت ادای
 صلاتدن نهی اولندیغک وقتلر اوله . اوقات مذکوره
 کونشک طوغدیغی . غروب ایتدیکی . حال استواده
 بولندیغی وقتلردر انجق جمعه کونی بو حکمدن مستثنادر
 زیرا جمعه کونلری وقت استواده ادای صلاة جائز اولور .
 ای مرید: سَنَك اوزرينه لازم اولان شیلرک اک مهمی اخلاق
 حمیده ایله اتصاف و فنا خویلدن اجتنابدر . اقتضای حال
 و موقعه کوره هر کسه کوزل خویلدن بریله معامله قیل .
 مکارم اخلاقدن برینی ترک ایدن کشی بدخوی صاییلور .
 او یله کیمسهک صحبت و الفتندن چکل . معلومک اولسونکه
 خلق عالم ، صنف صنف اولدیغی کبی اخلاق حسنه دخی
 صنفلره منقسمدر بناءً علیه خلقه قارشو هانکی خویک اک
 زیاده استعمالی لازم ولایق اولدیغی بیلیمکلیکک ایجاب
 ایدر . ایمدی اصناف مخلوقاتک اک چوغه یارایه جق خلق
 و طبیعت ؛ انلره ایصال راحت ، و کندولرندن دفع اذیتدر .

بناءً علیه الله رضا سیچون دائماً بو خوی اجرایه چالش .
 بیل که خلق عالم حق تعالی حضرتلرینک قوللریدر .
 حرکتلرنده مسخر و مجبور درلر . ناصیه اختیارلری
 محرک حقیقلرینک ید قدرتنده در .
 « بُعِثْتُ لِأَتَمَّ مَكَارِمِ الْأَخْلَاقِ » حدیث شریفی
 منظوقنجه سید الانبیا علیه افضل التحایا افندمزک مجرد
 کوزل خویلرک اتمای ایچون بعث بیورلمش اولمسی
 اخلاق حسنهک اهم مقاصد و آمال اولدیغنده شبهه
 بر اقدی .
 شریعت غرای احمدیه استرسهک حقنی آل . دیلرسهک
 براق . دیو امر ایتدیکی و یاخود استرسهک جزا ایت .
 استرسهک عفو آیه . دیدیکی محله سن عفو و صفحه
 مائل اول ؛ تاکه « فَمَنْ عَفَا وَأَصْلَحَ فَأَجْرُهُ عَلَى اللَّهِ » نص
 مبینی و جهله عفو و اصلاح ایدنلردن و اجر و مکافاتی
 جناب اللهه قالمش اولانلردن اوله سن . زیرا فنا لغه فناقله
 مقابله ایدرسهک « وَجَزَاءُ سَيِّئَةٍ سَيِّئَةٌ مِثْلُهَا » آیت جلیله سی
 حکمنجه کندی نفسکی سیئه یه محل ایتش اولورسن .

بناءً عليه سكا فئالق ايدن كيمسه دن قصاص طلب ايتمكدن
صاقين ؟ زيرا فئالق ايدن كيمسه يه ايدجك مقابله يي
جناب حق في الجملة سيئه تسميه بيوردي برده شرع شريفك
غضب ايت . ديدكي ايشده موجبنجه عمل ايله . الله
رضاسيچون بغض ايتماك كوزل خوي دكلدر . زيرا
بغض في الله عند اقدس الهيده مكارم اخلاق دن صاييلور .
سكا الزم اولان شيلردن بريده اعتقاداً و عملاً سكا
ضد و منافر اولانلرك و جنسكدن بولميانلرك الفت
و محبتلردن صاقمقدر فقط شو شرط ايله كه حققرنده
سوء اعتقادده بولميه سن و خواطر سيئه دن برشي تخطر
ايتميه سن بلكه بو صاقمه كي مجرد الله عبادتي و اهل اللهله
صحتي انلرك الفتته ترجيح و ايثار ايتك نيت خالصه سنه
بنا ايتليسين .

حيوانات حقنده عطف نظر شفقت و رحمت دخی
جملة لوازم حق شناسيدندر . زيرا حيوانات جناب خالق
لايزالك سكا مسخر بيورديغي مخلوقاتدندر . بناءً عليه
حيواناتي تحمللردن زياده يوكلمه و بونلردن بنيللرينه
عظمت و جبروت ايله بنه .

ملك يمينك اولان كوله و جاريه لره و خدمتكارلرينه
كذلك حسن معامله ايله . زيرا بونلر سنك اخوانكدر .
حققرنده نصل معامله و تصرف ايتديكي تجربه ايچون
جناب حق ناصيه اختيارلريني سنك الكه تسليم ايلدي .
سن دخی الله تعالى حضرتلرينك برقوليسن . بناءً عليه
كندی حقكده حق جل و علا حضرتلرينك نه يولده
معامله جميله و حسنه ده بولميسي ارزو ايدرسك كوله
و جاريه لرينه و خدمتكارلرينه او معامله ده بولك كه
فضل و رحمت الهيه يه محتاج اوله جفك كونده بو صورته
مظهر مكافاة اوله سن . اكر متأهل ايسك كذلك اهل
و عيالكله حسن معاشرت ايله زيرا « اَلْخَلْقُ كُلُّهُمْ عِيَالُ اللَّهِ
وَ احْبِبْهُمْ إِلَيْهِ انْفَعَهُمْ لِعِيَالِهِ » حديث شريفی منطوق منيفنجه
جميع مخلوقات بشريه عيال اللهدر و عند الهيده اك
زياده سوكيلى قول، عيالك منفعتلرينه اك زياده خدمت
ايدندر . سنده جملة عيالدنسك . حاصل كلام جناب
مالك الملك تعالى شانه حضرتلرينك سكا نصل معامله
بيورمسنی استر ايسك سنده خلقه عينيله او يله معامله

ایت. اکر اوغلك وارايسه اغراض دنيويه دن هيچ بر
غرضه مبنی اولیه رق کندوسنه کتاب اللهی اوکرت
و آداب شرعیه و اخلاق دینیه بی محافظه ایتسی اسبابی
استکمال ایله و انی کوچک لکدن ریاضته آلدیر و ساحة
قلبه شهوات دنیویه بی اکدیرمه و کندوسنه زینت حیات
دنیا بی و آخرت نعم باقیه سندن قسمتنی اکسلده جک امور
و اشیای بغض و نفرت ایتدیر و بومعاملات ادب
پرورانه بی مالجه و پاره جه خست یوزندن یاپمه .

سکا لازم اولان امور دن بریده ارباب غفلتک
قبولرینه یا قلاشماق و مجرد مقاصد و مرادات نفسانیه
ایلله مشغول و شیرین کام اولانلره مصاحب اولما مقدر زیرا
بونلر کوکلی حقدن الیرلر و خطرگاه غفلته دوشورلر .
اکر برایشدن طولای انلره صحبت و الفت مجبور
اولورسه کندیلرینه نصیحت قیل و خیانت ایتکدن صاقین
زیرا بومعامله ک حقه قارشودر .

سن آنلره خیر خواهانه نصیحت و خیانتلرندن
مجانبت ایتدکجه کندیلری سکا مسخر اولورلر و برده امر
دینده هر نه حالده بولورسه ک بولک . او حالدن

قورتیلوب دها کوزل برحاله وصولکی دائما جناب حقدن
نیاز واسترحامدن کیر و طورمه و جمیع حرکات و سکناتکده
حق ایلله حاضر اول یعنی اللهدن غافل اولمه .

ای مرید: طارلقده . بوللقده . وقت مسرتده . زمان
مصیبتده سکا انفاقی توصیه ایلرم امر انفاقه مسارعت
عندالهیده کی ارزاق مقسومیه کوکلیک و ثوق و اعتماد
ایتدیکنه یعنی اینانیدیغه دلالت ایدر . تحقیق بخیل اولان
کیمسه انفاق خصوصنده قورقاق اولور . زیرا شیطان
علی الدوام انسانه طول املی و چوق یشامق فکری
القا ایدرک دیرکه : « اکر مالکی انفاق ایدرسه ک هلاک
اولورسن . زیرا الک بوش قالور . اصحاب و اقرا نك آره سنده
رذیل و رسوای اولق تهاکسه دوشرسن . بناءً علیه
مالکی امساك ایلله و تقلبات دهره قارشو احتیاط کارلقده
بولک . شمدی کوردیکک بوللغه الدائم . کله جک سنه
جناب اللهک نه یاپه جغنی بیلمزسن » و اکر اورتاللقده
قحط و غلا وارايسه شیطان دیرکه « مالکی کندی
نفسک ایچون صاقله . کیمسه برشی ویرمه . بو قحط
و غلالتک نه وقت مندفع اوله جغنی تخمین ایدمه مزسن .

کورینشده بو حال شدت برطرف اولمق شویله طورسون
زیاده لشه جکدر. سن نفسکی کوزت. الگده برشی قالمزسه
کیمسه دن سکا فائده یوقدر هرکسک نظرنده منفور
ومستثقل اولورسن و خلقه ثقلت ویررسن یوزیکک
صوبی دوکیلور « ایشته بوسوسه شیطانیه قلبه مسلط
اوله اوله انسانی بخل و خستک درجه منتهاسنه واردیر
و بوسبيله استعین بالله » وَمَنْ يَوْقِ شَحِّ نَفْسِهِ فَأُولَئِكَ
هُمْ الْمَفْلَحُونَ « آیت کریمه سنک حکم منیفندن بهره دار
فلاح و سلامت اولمقدن » وَمَنْ يَخْلُ فَأَمَّا يَخْلُ عَنْ نَفْسِهِ «
قول الهیسنندن دخی عبرت آلمقدن محروم براقیر. بزم
عندمزرده آیت بخلک عقبنده کی « وَإِنْ تَوَلَّوْا يَسْتَبَدِلْ
قَوْمًا غَيْرَكُمْ » قول الهیسنندن اکلاشیلان معنای حقیقت
انما ایجابجه طریقت جلیله صوفیه ده بر انسان اهل الله
واولیا به التحاق ایلد کدنصکره اظهار بخل و شح ایدرسه
نائل اولدینی مقام عالیدن ایندیریلوب یرینه سخی
وجوانمرد اولانلردن بر کریم نصب و ترفیع ایدیلور.

حاصلی بخل اولان کیمسه « رَبَّنَا أَطْمِسْ عَلَيَّ أَمْوَالِهِمْ
وَأَشْدِدْ عَلَيَّ قُلُوبَهُمْ » آیت کریمه سنک متضمن اولدینی
حکمتی ادراک ایتامشدر بوبلاغ بلیغ الهی حضرت موسی
علی نبینا و علیه الصلوة والسلامک فرعونک علیه
وقوعبولان دعاسی جمله سننددرکه جناب حق فرعون ایله
عونه سنک هلاکفی مراد بیورنجه حضرت موسی
علیه السلام انلرک بخل ایله مرزوق اولملرینی اجابتگاه
عادل مطلقدن طلب واستدعا ایلدی بودعانتک تأثیر بلیغیه
کندولرینه بخل و خست عارض اولوب بوسبيله ایچلرندن
فقیر اولانلری آچلقله هلاک اولملریله جناب حق فرعون
وقومنی بویوزدن اخذ واستیصال بیوردی. ودخی بخیل
اولان کیمسه « إِنَّ لِلَّهِ مَلَکَيْنِ فِي كُلِّ يَوْمٍ يُنَادِيَانِ عِنْدَ كُلِّ
صَبَاحٍ اللَّهُمَّ اعْطِ كُلَّ مَنْفِقٍ خَلْفًا وَكُلَّ مُمْسِكٍ تَلْفًا » حدیث
شریفنک حکمندن ده بهره مند عبرت اولمامشدر. معنای
جلیلی جناب حقک ایکی ملکی واردر که هرکون صباح
وقتنده یارب هرمنفق اولانه انفاق ایتدیکی ماله بدل

و خلف ویر و هر ممسك مالنی اتلاف ایلله قولیلله ندا
ایدرلر دیمکدر وسید کائنات علیه افضل التحیات
افندمزه ایکی کنز لایفنی ویرلدیکی زمان انلری اخذ
و قبول یرینه ترکلرینی اختیار بیور مسنك حقیقت
نجات غایتنی دخی اکلایه مامشدر .

و ابوبکر الصدیق رضی الله عنه سید کائنات صلی الله
علیه وسلم افندمزه حضور سعادتنه اهنه جمیع مالنی
کتور و بده یا ابابکر چولغکه چوجغکه نه براقدهک ، سؤال
رسالتپناهیسنه قارشی . اللهم و رسولنی براقدم ، یولنده
جواب ویردیکنده و حضرت عمر رضی الله عنک کذلک
حضور عرش آستان سید الکویننه مالک یاریسنی عرض
و تقدیم ایتدیکی صروده اعرف الانبیا افندمزه اهل
و عیالکه نه ترک ایلدهک ، سؤال حکمت اشتهالنه مقابل
یا رسول الله مالک نصفنی ترک ایلدم دیدیکنده ، ارا کزدهکی
فرق و تفاضل ایکی کله کزک ارا سندهکی فرق و تفاضل
ایلله متناسبدر خطاب رسالتپناهیسنك دخی اصل و مزیتنی
بیله مامشدر . حاصلی امر انفاق . دنیا و آخرتده رزاق
حقیقیدن استجلاب ارزاقه سبیدر . ایمدی ممسك و بنجیل

اولان کیمسه جناب حتی اتهام و کندی مالنه اعتماد ایتمش
اولور و نقد موجودینه وثوق و اعتمادی رب کریمنه اولان
وثوق و اعتماددن ده قوتلی اولق لازم کلور بوایسه
ایمانه طعن و خلل ویرر نسأل الله العافیه .

ایمدی ای مرید : بوللقد و طارلقده انفاقه دوام ایلله
فقر و ضرورتدن قورقه جناب حق سکا وعد بیوردیغنی
کرك بالذات کندهک و کرك جمیع عالم ایسته سون ایسته سون
انجاز و ایفا بیورر هیچ بر جوا نمر داصلا هلاک اولما مشدر
اگر بور ساله مزده آز یازمغنی التزام ایتماش اولسه ایدک
شو تفصیلاتی تأیید ایده جک ده بر چوق اخبار ، درج
و ازبار ایدر ایدک .

﴿ فصل ﴾

ای مرید : کیمسه یه اوفکه و غضبکی کو ستر مامکه چالش .
اوفکه و غضبکی کو ستر مدیکک حالده جناب ارحم الراحمینی
ارضاً و شیطان لعینی اغضاب و نفسکی تربیه و اصلاح
ایتمش اولورسن . زیرا غضب هوای نفس مقتضاسندن
اولدیغندن اظهار غضب ایتدیکنک صورتده نفس سرکش

بالطبع هو اسندن کچر وسکا اطاعت ایلر خصوصیه
 اوفکه کئی کو سترمیه جک اولور ایسه ک غضبه سبب اولان
 کیمسه نک کو کانی سویندیرمش و فعلنه جزا ایتماش
 اوله جقسک که بومعامله ک او کیمسه نک نفسنجه کن دیسنه
 جزا ایتمکدن زیاده مؤثر در خصوصیه آنک دائره
 حق وانصافه رجوعنه باعث واعتراف قصور نی مستلزم
 اوله بیلور بناءً علیه بونصیحتی قبوله اهتمام وبو خوی
 التزام ایله بونک اجر و ثوابی البته میزانکده بولورسن.
 بومسئله ده اصل فائده نک اک بیوکی وسوینجک اعظمی سن
 اوفکه کئی کیزلر سه ک جناب عادل مطلق دخی غضب الهیسنی
 موجب اولان افعالکدن طولایی سنی مؤاخذه بیورمن
 زیرا سنجه باعث غضب اوله جق بر معامله ده بولنان
 کیمسه نی عفو ایتدی کک ایچون جناب حقه بو معامله
 عفویه کله سکا مکافات بیوره جقدر بو حقیقه کوره ارتق
 مؤمن قرداشکک قصور نی عفو ایتمکدن و اذاسنه تحمل
 ایلمکدن دها بیوک فائده تصور اولنه بیلور می ؟ جناب
 حکیم لایزال قوللرینه سنک نه معامله ده بولنه کی اراده
 بیورمش ایسه سکاده عینیه اوله معامله بیورر بناءً علیه

سندده بوصفت دلپورانه و خصلت و داد کسترانه ایله
 اتصاف و تخلقه سمی واجتهاد ایله زیرا بو کوزل خوی
 خلقک قلبلرینه ایراث محبت ایدر محبوب الهی صلی الله
 علیه وسلم افندمن یکدیگریمزله سویشمکی و محبت اوزره
 بولنغنی امر و تآکید بیورمشدر بو خصلت جمیه ایسه محبتی
 ایجاب ایتدیرن اسبابک اک بیوکار ندندر.

﴿ فصل ﴾

ای مرید: دائماً مقام احسانه ملازمت ایله زیرا احسان
 حق تعالی حضرتلرنندن حیایه و محسن اولان قلبده تجلی
 تعظیم خدایه سبیدر. حضرت جبریل امین علیه صلوات
 المعین « مَا الْإِحْسَانُ » یعنی احسان نه در سؤال بیورمسی
 اوزرینه اعرف الانبیا علیه افضل التحایا افندمن « اَنْ
 تَعْبُدَ اللَّهَ كَأَنَّكَ تَرَاهُ » یعنی الله تعالی حضرتلر نی
 کوررجه سنه ذات اقدس الهیسنه عبادت ایتمک ککدر
 جواب حقیقت نصیبی و یردی لر ایشته مقام احسانک
 نومرتبه سی یعنی جناب حق کوررجه سنه عبادت ایتمک

محسن اولان مؤمنك قابنده تجلی تعظیم الهی به بادیدر بو
 جوابدن صکره ینه صلی الله علیه وسلم افندمن «فَإِنْ لَمْ تَكُنْ
 تَرَاهُ فَإِنَّهُ يَرَاكَ» یعنی سن الله تعالی حضرتلرینی کوره من
 ایسهك جناب حق سنی کورر بیوردیلر ایشته بو مرتبه
 احسان دخی محسن اولان مؤمنك جناب اللهدن حیا سنی
 مؤدیدر صلی الله تعالی علیه وسلم افندمن «الحیاء خیر کله»
 حدیث شریفله حیانتک هپسی خیردن عبارت اولدیغنی
 بیان بیورمش اولدیغنه کوره بر مؤمنده حیا بولنجه
 او مؤمنده فنالق بولنه من و كذلك قلبی حیا قایلانجه دنیا
 و آخرتده او یله بر کوکل صاحبی فنالق کوره من. شواییکی
 مرتبه احساندن ایکنجی مرتبه یعنی قلبه حیا غلبه ایدنجه
 او یله بر کوکل صاحبی هیچ بر کسه نك اوزرینه دعوا ی
 تحکم وربانیت اتمک قالقشمن ایمدی مقام احسانک شو
 ایکی صفت جلیله سنی احرازه اهتمام و دائما مقام احسانی
 التزام ایله تحقیق شو ایضاحات ایله احسانک فائده
 سعادت عانده سنی سکا افاضه ایلدم .

﴿ فصل ﴾

ای مرید: سحر وقتنده استغفار دوز کر پروردکاره
 دوام و ملازمت ایت. معلومك اولسون که استغفار، کناه
 عقینده اولور سه کناهی محو و ازاله ایدر. طاعت و احسانی
 متعاقب و قوعبولور سه نور اوزرینه نور، و سرور اوزرینه
 سرور اولور. ذکر الله دخی قلبی پاره پاره و هر پاره سی
 بر طرفه آواره اولمقدن یعنی قلبک قصد و همتنی پریشانلقدن
 قور تاروب بر نقطه ده اجتماعنه خدمت ایدر و صفای
 خاطری استلزام ایلر. اکر ذکر اوصانور سه نك
 قرآن عظیم الشاندن اوقو، لکن اوقورکن معانی سنی
 دوشونملیسن و توحید و تنزیهه دائر آیات کریمه به تعظیم
 ایلملیسن و خیر و رجایی متضمن آیات جلیله ده رحمت
 الهیه بی استملیسن و خوف و وعید آیتلرنده حفظ آلهیده
 بولمکی جناب ارحم الراحمیندن یالوارملیسن و قصص ام
 سالفه بی مبین اولان آیات جلیله دن دخی عبرت آلملیسن
 تحقیق قرآن کریمك متضمن اولدیغنی معانی لا تحصانك

اختلاف و تنوعی حسبیلہ قرائتندن کیمسیدہ ملال و اوصانج کلز .

﴿ فصل ﴾

ای مرید: کناه ایشلمک ایچون کولکشدہ کی اصرار دو کومفی چوزمکہ چالش . لکن بومہم ایشہ قدرت و امکان بولہ منسک، مکر کہ نفسکہ خطاباً « ای نفس سرکش شمدی الدیغک نفسدن بشقہ نفس الہ بیلہ جکگی بیلور میسک؟ اللہ بیلور اما، احتمالکہ شمدی الدیغک نفس حیات دنیادن اقصوک نفسکدر اولوم بونفسدہ یاقہ گہ صاریلور . حالبوکہ سن فزالق اوزرینہ اصرار ایدیورسن . کناه اوزرینہ مصر اولنلر ایچون عند عادل مطلقده طاغلرک طاقت کتورہ میہ جکی عذاب الیم وارد! اویلہ بر عذابہ سنک کی ضعیف نصل تحمل ایدر؟ اللہ توبہ و رجوع ایلہ . زیرا سن بیلورسن کہ پنجه جانربای اجل، نه وقت کریبانچاک حیاتک اولہ جقدر تحقیق « وَلَيْسَتِ التَّوْبَةُ لِلَّذِينَ يَعْمَلُونَ السَّيِّئَاتِ حَتَّىٰ اِذَا حَضَرَ أَحَدَهُمُ الْمَوْتُ قَالَ اِنِّیْ تَبْتُ الْاَنَ » نص

مبینی وجهلہ ارتق ترک حیات ایدہ جکفی تیقن ایدنلرک توبہ سی مقبول الہی اولہ من « وَاِنَّ اللّٰهَ يَقْبَلُ تَوْبَةَ عَبْدِهٖ مَالَمْ یَغْرِغِرْ » حدیث شریفندن دخی مستبان اولدیفی اوزرہ قول . حالت غرغریہ کلد کدنصکرہ ایدہ جکی توبہ دن فائده کورہ من . نیجه آدم یر ایچر جماع ایدرکن موت نا کھانی یہ اوغرا دی و یاخود او یقوده ایکن خواب ابدی یہ واردی . کہ ایچلرنندن هر هانکیسی دهاول جناب حقہ توبہ و رجوع ایتماش ایدیسه ذنوب اوزرینہ مصر اولدیفی حالده حفره مماته دوشدی « و امثالی مواعظ مؤثرہ ایلہ نفسک و عظ و نصیحتدن خالی قالمیہ سن . اکر دائماً بویولده نفسکی تنبیہ و ایقاظہ چالیشورسک باذن اللہ عقدہ اصرار چوزیلور . والافلا

﴿ فصل ﴾

ای مرید: ظاهر او باطناً تقوایی التزام ایلہ . تقوی عقاب الہیدن صاقمقدر ، تحقیق عذاب عادل مطلقدن قورقان

کیمسه رضای الہی بہ موافق اولان افعاله مسارعت ایدر
 بوبابده اصدق القائلین « وَیَحْذَرُکُمُ اللّٰهُ نَفْسَهُ وَاعْلَمُوا اَنَّ اللّٰهَ
 یَعْلَمُ مَا فِیْ اَنْفُسِکُمْ فَاحْذَرُوْهُ » بیوردی تقوی و قایه دن مشتقدر
 زرهلرک و سپرلرک اک قوی واک بیوکی ایسه وقایه اللهدر
 واسطه رحمت مولا صلی الله تعالی علیه وسلم افندمن « اَعُوْذُ
 بِرِضَاکَ مِنْ سَخَطِکَ وَبِمَعَاْفَاتِکَ مِنْ عُقُوْبَتِکَ وَاعُوْذُ بِکَ مِنْکَ »
 مناجاتیلہ دعاخوان اولمشلردرکه مزایای حقیقت احتواسی
 سخط و غضب ذوالجلالکدن. رضای جمالکّه و عقوبت
 و عذابکدن معافات الہیہ کّه وسندن سکا صغیریم دیمکدر .
 ایمدی سندن فعل الله ایلہ یعنی رضای الہی بہ موافق
 عمل ایلہ غضب الہیدن صاقین و هر قننی شیدن قورقار
 ایسهک اوشیئہ سنی ایرشدیرہ جک یولدن چکل . تحقیق
 طاعت سرمنزل سعادتہ ایرشدیریجی طوغری بر یول
 اولدینی کبی معصیت دخی شقاوتہ ایصال ایدیجی بر طریقدر
 رضای الہی بی قزانہرق غضب ربانیدن اتقا ایدہ بیله جکک
 کبی سعادت یولہ دوام ایلہ طریق شقاوتدن وجنتہ یارار
 اعمال ایلہ دہ نارجهنمدن اتقا یلرسن . ایشتہ بویله جه منازل

تقوی اوزرینه یوری . الله تعالی حضرتلری تنزیل کریمندہ
 « وَاتَّقُوا اللّٰهَ وَاتَّقُوا النَّارَ » بیوردی . بناءً علیہ تعریف
 ایتدیکم صورتدہ طریق تقوایہ سلوک ایدرسهک ان شاء الله
 تعالی نجات بولورسن .

﴿ فصل ﴾

ای مرید : کنناہ ایشلمکده مصر و مستمر اولدیفک
 حالده کرم ربانی و حلم صمدانی یه مغرور اولمقدن صاقین .
 بوبابده سنی ابلیس الدادوب دیرک « سنک کنناہ و مخالفتک
 اولماش اولسه ایدی کرم و عفو الہیسی و رحمت و غفران
 نامتناهیسی نصل ظهوره کلوی ایدی » بوسوز ایسه قائلنک
 نہایت مرتبه جہلندن ایلروکلور . زیرا حکیم لایزالک
 قولنی طاعت الہیہ سنہ موفق و رضای ربانیسنہ موافق
 اولمیان ایشی یایمقدن وقایہ بیورمسی دہ کرم و رحمت
 صمدانیہ سی جمله سندندر و ابلیس سکا دیرک « سنک ایچون
 مقام احسانده و خیرات و حسناتده بولنانلرک درجه سنہ
 وصوله یول یوقدر . زیرا انلر طاعات الہیہ دن موفق

اولدقلىرى شىئله بوعالمده مظهر رحمت ارحم الراحمين اولوب
نوبتلرينى صاوديلر . روز فرداي قيامتده ايسه كرم
وحلم ربانىسى ورحمت وغفران صمدانىسى قوللارندن عاصى
اولنلر حقنده ظاهر اولور » زينهار ابليسك بو سوزينه
قائمه والدائمه و نفسكى شرنندن محافظه ايله واکا جواباً
دى که : حلم و کرم الهى و عفو ربانى حقنده سويلد يکک
سوزلر صحيحدر . و قوللرک کناهلرى و معصيتلرى اولماش
اولسه ايدى زعمنجه بوصفات الهيه نك آثارى ظهوره
کلزدى . بوده طوغريدربويابده آثار صحيحه و اخبار موثوقه
ورود ايتشدرب . لکن اى ابليس بوسوزکله رحمت الهيه
طيانهرق جناب معبود حقيقى يه عصيان ايتکلکم ايجون
کرم الهى ايله بنى اغوا ايتک مى استيورسن ؟ بنم معفو
ومغفور و مرحوم اوله جقلردن اولديغمى نره دن بيليورسن
اوت ، جناب حق قوللارندن ديله ديکنى کرم و مغفرت
الهي سنه مظهر بيوره جقدر ، آمنا . نصل که عبادندن عاصى
اولانلردن بر طائفه عقيب قهارانه و عذاب و نقيمت
عادلانه سيلاه تعذيب ايدجکدر . بن ايسه بوايکى فرقه نك
هانکيسندن اولديغمى بيلميورم . يالکز کنديمى معصيت

ايچنده کورسيورم احتمال که . جناب حق بنى بوعالمده معصيتدن
توبه ايتک موفقيتندن نصل محروم براقش ايسه نار جحيمه
کيرمزدن اول عفو الهيسندنده اوله محروم بيورر و بندن
انتقام آلور واکر دين اسلام اوزرينه اولمکلکم نصيب
اولور ايسه بو انتقامدن صکره نار جهنمدن چيقارر
معاصى ايسه کفر تاتاريدرب . بالفرض اکر بن مظهر عفو
الهى اوله جق طاقدن اولديغمى و کنشاء سبيله مؤاخذه
اولميه جغمى قطعياً بيلمش اولسه م احتمال که سوزيکه
الدانوردم مع هذا بوده بنجه سوء ادب و محض جهالتدر
بلکه عذاب الهيدن امين بولنديغم فرض اولنسه بکاواجب
اولان وظيفه تشکراً و جناب حقندن حياء جهد و طاقتى
طاعت الهيه بذل و صرف ايتکدر . جناب حق ايسه على
التعين بويله بر تبشيرايله بنى تأمين ايتدى ، بلکه امر معصيته
عفو و عذابى آره سنده باشى بوش براقدى او حالده سنک
بويلان سوزيکه نصل الدانه يم . و دائماً فنانى امر ايدن
نفس اماره نك مواعدينه نه قوتله دايانه يم .

﴿ فصل ﴾

ای مرید : نفسکده ورّعی التزام ایله ورّع نفسکده شبهه و تردد ویرن هر برشیدن صاقنمق دیمکدر « دَعَّ مَایْرِیْبُکَ اِلَی مَایْرِیْبُکَ » حدیث شریفی که مأل حکمت اشتمالی شول شیدده که سکا شک و شبهه عارض اوله وسنی اوشی خایجانه واضطرابه دوشوره انی ترک ایله سکا شبهه و خلجان ویرمیان شیئه رجوع ایت و تعبیر دیگر اوزره بر شیئک حل و حرمت و سنّیت و بدعتینده شبههک اولسه اوشی کرک قول و کرک فعل و کرک عبادت و نکاح و سائر معاملات اولسون آنی براقوب حالی متیقن و حقیقتی معلوم اولان شیئه عدول ایله دیمکدر بو حدیث شریف ورّعک حقیقتنی و صورت اجراسنی مبنیدر . همیشه بو حدیث جلیل رسالتپناهینک حکم حکمت پرور یله عامل اول و منوال مشروح اوزره کوکلیکی شک و شبههیه دوشورن شیئه ولو که محتاج اولسهک و اوصرمده آندن

غیر یسنی تدارک ایدمهسسهک دخی آنی الله رضا سیچون ترک ایله و استعمالدن صاقین . بویله پیارسهک محقق بیل که جناب حق اوشیدن خیرلیسنی احسان بیورر . فقط استعجال ایتمه . ایمدی ای مرید دینک تملی و حق یولی اولان ورّع حالیه حاللنورسهک هر عملک خالص و صاف اولور و هرایشک حسن نتیجه بولور . احوالک یولنه کیرر . کرامات الهیه هر یوزدن سکا تجلی ایدر . جمیع امور کده حفظ الهی ایله محفوظ و مأمون اولورسن . بوالطاف الهیهیه مظهر اوله جفکده بزجه هیچ بر شبهه یوقدر . لکن طریق ورعدن یوز چویرر و بی پروا هر شیئه یوز ویرر ایسهک ، عادل مطلق حضرتلری سنی مخذول و پریشان ایدر و کندی نفسکه حواله ایلر . شیطان هر طرفدن اغوا و اضلاله قدرتیاب اولور . بناءً علیه صاقین قرداشم استطاعتک مقدارنجه ورّع یولندن ایرمه .

﴿ فصل ﴾

ای مرید : بو عبرتخانه دنیا ده زهده ملازمت و آز شیئه رغبت ایله .

﴿ استطراد ﴾

دنیا مزرعه آخرت و واسطه سعادت ابد غایت
اولدینی حیثیتله حد ذاتنده مذموم اولق بشویله طورسون
ممدوح و مقبولدر . اصل مذموم اولان شی مطالب
و شهوات دنیویه قلباً و قالباً میل ایله حقندن غافل اولمقدردر .
حکمت نمای « ما ينطق عن الهوى » علیه افضل التحایا افندمره
دنیا نهدن عبارتدر دیو و قوعبولان سؤاله جواباً « الدُّنْيَا
مَا اَلْهَاكَ عَنْ مَوْلَاكَ » بیورمشدر که مال حقیقت اشتمالی
دنیا ، مولای کریمک ذکر و طاعتندن سنی اشغال ایدن
و غفلته دوشورن شیدر دیمکدر . شو حالده مذموم
اولان نفس دنیا دکل ، انسانی حقندن غافل قیلان اشیادن
عبارتدر « مَنْ آثَرَ الدُّنْيَا عَلَى الْآخِرَةِ ابْتَلَاهُ اللَّهُ بِثَلَاثِ هَمٍّ
لَا يَفَارِقُهُ أَبَدًا وَ فَقْرٌ لَا يَسْتَغْنِي أَبَدًا وَ حِرْصٌ لَا يَشْبَعُ أَبَدًا »
حدیث شریفی که معنای حکمت احتواسی دنیایی آخرته
ترجیح ایدن کیمسه بی باری تعالی اوج شیئه مبتلا ایدر

بریبی هم واضطر ایدر که ابداً کندیسندن ایرلق بیلمز
ایکنجیسی فقر قلبددر که مدة العمر او کیمسه بی دنیایه
عرض احتیاجدن مستغنی قیلمز . او چنجیسی حرص
و طمعدر که کندیبی مادام الحیات طوقلق حس ایلمز .
دیمکدر بوده یوقاریده آرایش بخش صحیفه سطور اولان
حدیث شریفک مضمونتی متضمندر . امعان نظر دقت
اولنورسه بو حدیث شریفک مبین اولدینی احوال ثلثه
آخرتی اونودان و حریص دنیا اولانلرک جمله سنده
هر آن وزمان ملحوظ دیدۀ اعتبار اولور . فقط ترك دنیا
تعبیرندن کوته نظرانک اکلایشی وجهله انسانک ایشسر
کوچسر گوشه نشین عطالت و بطالت اولسی لازم کلور
کبی بر معنا استنباط ایدلما ملیدر . زیرا (اِنَّ اللَّهَ يُحِبُّ اَنْ يَرَى
الْمُؤْمِنَ مُخْتَرِفًا) و « اِنَّ اللَّهَ يُحِبُّ الْعَبْدَ الْمُخْتَرِفَ » و « الْكَاسِبُ
حَبِيبُ اللَّهِ » و امثالی احادیث شریفه نك دلالتی وجهله جناب
روزی رسان انس و جان حرفت و صنعت و تجارت اصحابی
مشمول نظر رضا و رحمت بیورر . بو حکمته مبنیدر که کافه
یغمبران عظام برر صنعت و حرفتله اشتغال ایلدیلر حتی

مرویدر که حضرت عمر رضی الله عنه پیغوله کزین عطالت،
بر جماعت مسلمینه تصادف ایلدی. سنز کیمسکیز دیوب.
بزمتوکلیندنز. جوانی النجه حاشا متوکل دکل متاکسکیز
زیرا متوکل، بطن ارضه القای حبوب ایلله رزاق کائناتک
لطف عمیمنه توکل واعتماد ایدن کیمسه در. بیوردی.

بعض علماء محققین دخی شرع شریفک حرقت وصنعت
وتجارت کی اباحه ایلدیکی کسب مشروعی ایمان مرتبه سنه
ملحق کوروب وجوب مؤ کدله واجبدر دیدیلر و بو
وجوبی « وَإِذَا قُضِيَتِ الصَّلَاةُ فَانْتَشِرُوا فِي الْأَرْضِ وَابْتَغُوا
مِنْ فَضْلِ اللَّهِ » آیت جلیله سنه بنا ایلدیلر شو حالده ترك
دنیا دن مقصد اختیار عطالت دیمک اولیوب بلکه تکاثر
وتفاخر نقطه نظرندن حلال و حرام و حقوق عباد
دیمیه رك جمع اموال دنیایه حرص و انهماك ایتما مک
ودنیایی آخرته ترجیح ایده جک واللہ تعالیٰ حضرتلرینی
اونوده جق صورتده محبت فانیاتی قلبه یرلشدیر مامکدر
ومن الله التوفیق .

دنیا دن طالب اوله بیله جکک برشی واریسه اودمه

وجه حاللندن بریه جکله کیسه جکدن برده بارینه جق بر
مسکندن عبارتدر بناء علیه طلب ورغبتکی یالکیز بوکا
قصر آیلله. ابنای دنیا نك حلال و حرام دیمیوب جمع ابتدکی
امواله و بویوزدن نائل اولدینی سعادت حاله میل ورغبت
ایتمه .

دنیا بقاسی اولیان بر عرضدر. دنیا یه راغب اولان
کیمسه دنیا دن ابدأ مقصدینه نائل اولمز. زیرا دنیا یه رغبت
ایدن کیمسه نك دنیا ده کی امللری جداً چوق اولور
حالبوکه جناب رب منان اموال دنیا دن او کیمسه یه هر نه
قسمت ایتمش ایسه انجق انی عطا واحسان بیورر. او کیمسه
ایسترسه دنیا یه راغب اولسون، ایسترسه اولسون، عند
الهیده مساویدر یعنی هرکس تجلیخانه (نحن قسمنا) ده
تقدیر کرده آلهی اولان شی هر نه ایسه ایستر ایستمر
انجق اکا دسترس اولور بنابرین دنیا پرست اولان کیمسه
بالطبع کثیرالآمال اوله جغندن و مقدر اولیان امللرینه
ایسه قدر لایتنغیر آلهی اقتضا سنجه بالضروره نائل
اوله میه جغندن حیاتده اولدجه دائماً غمناک و حزین و معنأ

دخی مغضوب رب العالمین اولور. نفس الامرده طالب دنیا
دکز صوبی ایچن کیسه کیدرکه دکز صویندن ایچدکه
حرارتی آرتار. اعرف الانیا افندمک دنیا بی جیفه
ومزبله یه تشبیه بیورمسی میل دنیادن صاقمق ایچون سکا
برعبرت کافیه در. ایددی جناب رزاق لایزال دنیادن سکا
نه تقسیم و تقدیر بیورمش ایسه اکا راضی اول. زیرا رزق
مقسومگی ایستسه ک ده ابا ایتسه کده سکا ایصال بیورر.

جناب حق حضرت موسی علیه السلامه «یا ابن آدم

ان رَضِیتَ بِمَا قَسَمْتُ لَكَ اَرَحْتَ قَلْبَكَ وَاَنْتَ مَحْمُودٌ وَاَنْ لَمْ
تَرْضَ بِمَا قَسَمْتُ لَكَ سَلَطْتُ عَلَيْكَ الدُّنْيَا تَرْضُ فِيْهَا رِغْصَ
الْوَحْشِ فِي الْبَرِيَّةِ ثُمَّ وَعِزَّتِي وَجَلَالِي لَا تَنَالُ مِنْهَا اِلَّا مَا قَدَرْتُ

لَكَ وَاَنْتَ مَذْمُومٌ» خطاب الیهیسیله تجلینمای تنبیه وایقظاظ
اولدی که مال حکمت اشتهالی ای آدم اوغلی اکر تقسیم
ازلی الیهیمه راضی اولورسه ک ممدوح و محمود اولدیغک
حالده قلبکی راحتلندیرمش اولورسن واکر سکا تقسیم
و تقدیر بیوردیغمه راضی اولمز ایسه ک سنک اوزرینه

دنیا بی مسلط ایدرم بیابانده حیوان وحشینک سکرتمسی
کبی سنده ساحه دنیاده هارل هارل ایاق تپرسک مع هذا
عزت و جلاله قسم ایدرمکه دنیا رقه سنده نه قدر سکرتمسه ک
مقدوح و مذموم اولدیغک حالده ینه انجق تقسیم و تقدیر
بیوردیغم شیئه نائل اولورسن.

ای قرداشم! فرض ایت که جناب حق جمیع اموال و نعم
دنیا بی سکا بخش و احسان ایلدی سنک نهایت دنیادن
استفاده ایده جکک شی بارینه جق برمسکندن. وجودیکی
اورته جک بر لباسدن. آچلیغکی دفع ایده جک برپارچه
یه جکدن. عبارت دکلیدر؟ بواوچ شیئه ایسه دنیانک هر یوز
چویردیکی آدم نائل اولمقله برابر بو عالمده راحت قلب
و آخرتده خفت حساب سببیلله سکاراجح و فائق اولور.

ای مرید: صاقین سنک فنا بولمقلغکله برابر فنا
بوله جق اولان متاع دنیا یه مولای کریمکدن اولان حظ
و سعادت ابدیه کی صاتممه. احتمالدرکه طلب دنیا یولنه ایلاک
اته جغک آدیمده اجلاک کلیر. دنیادن چیقار کیدرسن
او حالده آمال دنیویه گدنده برشی حاصل اولماش بولنور
بیلیرسن که دنیانک اولادی اولدیغی مثللو آخرتکده

اولادی وارد ر . سن نبی ذیشان علیه الصلوة الرحمن
 افندمرك امر ایتدکاری کبی اولاد آخرتدن اول . دنیا
 اولادندن اوله . قرآن کریمی او قود یغکده کلام مولا کئی
 تفکر قیل . حرامدن . حقوق ناسدن . اسرافات بی
 فائده دن صاقتمه نك لزوم و وجوبی درك ایتک ایسترسه ک
 استعید بالله « مَنْ كَانَ يُرِيدُ الْحَيَاةَ الدُّنْيَا وَزَيَّنَّهَا نُوفِ اللَّهُ لَهُمْ
 أَعْمَالُهُمْ فِيهَا وَهُمْ فِيهَا لَا يُخْسِرُونَ أُولَئِكَ الَّذِينَ لَيْسَ لَهُمْ
 فِي الْآخِرَةِ إِلَّا النَّارُ وَحَبِطَ مَا صَنَعُوا فِيهَا وَبَاطِلٌ مَا كَانُوا
 يَعْمَلُونَ [١] وَمَنْ كَانَ يُرِيدُ حَرْثَ الْآخِرَةِ نَزِدْ لَهُ فِي حَرْثِهِ

[١] تفسیر شریفی مجرد حیات دنیایی و تکثیر اموال و اولاد
 کبی زخارف فنا انجای قصد ایدرک اختیار اعمال و شدائد و متاعب
 دنیویه بی احتمال ایدن کیمسه لک مکافاة اعمالی عزم و مقصد لری
 وجهله بونشته اولاده ایفا ایدرز انلک غرضی مجرد آمال دنیایه
 مقصور و محصور ایسه کندیلری خیرلی عمللرندن هیچ برینک
 مکافات عاجله سندن نقص و خساره او غراملرلر ایشته بونلر شول
 قاصر نظران همت و ظاهر پرستان غفلتدرکه کندیلری ایچون آخرتده
 نارحرماندن غیری هیچ برشی یوقدر زیرا مکافات حسناتلری بودنیاده

وَمَنْ كَانَ يُرِيدُ حَرْثَ الدُّنْيَا نُؤْتِهِ مِنْهَا وَمَا لَهُ فِي الْآخِرَةِ مِنْ
 نَصِيبٍ [٢] آیات جلیله سنه عطف نظر تامل ایله .

❖ خاتمه اعتبار ❖

ای مرید : حق جل و علا . سنی خواب غفلتدن

ایفا اولندیغی ایچون یوم حسابده کندیلرنده سیئاتدن بشقه برشی
 قالمز سیئاتک مجازاتی ایسه نار بعد و حرمان و اندن مترتب الام
 و احزاندر یومثلولرک دنیاده ایشلدکاری حسناتک جمله سی ساقط
 و باطلدر .

[٢] نشئه آخری یعنی نعمتسرای عقباده بهره مند اثمار منویات
 و کرامات اولمق ایچون بونشته اولی یعنی تجربتخانه دنیاده اعمال
 صالحه و اخلاق حمیده تخمینی زرع ایدن کسه نك ثوابی مضاعف
 و افزون و طرف عظیم الشانزدن تفضلاً و تکرماً کندوسنی مظهر
 لذات و نعم کونا کون ایلرز و مزرعه دنیاده زرع ایتدیکی بذور
 اعمال صالحه دن بنه بودنیاده اقتطاف اثمار مکافاة ایتک ایستیان
 کیمسه یوده مقصد عاجلی نه ایسه انی و یررز لکن او کیمسه لذات
 و شهوات فانیة دنیویه بی آخرتک لذات و نعم سرمده سی اوزرینه
 اختیار ایتدیکندن طولانی لذات باقیه و فتوحات روحانیة آخرتدن
 اولان حظ و نصیبندن نفسی محروم ایتش اولور .

بیدار و هرنفسده آدیم آتدیغك رجعتكاه سرمدينك
حقایقندن بهره مند عرفان و ابتصار بیورسون . بوتجر تخانه
فناده مادام الحیات هر نه ایشلمش و سویلمش ایسهك
جمله سی ایچون، دیوان مقدس الاركان عادل حقیقیده
وقفه کیر حساب، و عرق ریز مناقشه اکتساب اوله جغکدن
هیچ بر آن تغافل و تجاهل اتمه، و مع هذا بونلرك
محاسبه سنی زنه ار دار جزایه براقه . بوفرصتخانه امكانده
ایکن حسابی نفسکله کوروب بتیرمك و سندی سپیدی
بوراده ییرتوب آتمق سنك ایچون چاره نجاتدر .

ای قرداشم (حاسبوا انفسکم قبل ان تحاسبوا و زینوها
قبل ان توزن علیکم) امر رسالتیناهیسنه قولاق طوت .
انفاس معدوده حیاتك مهات و مساعدده سنندن اغتنام
فرصتله تنهانشین حفره خاک اولمزدن اول . نفسکی محاسبهیه
چك . حیاتده بولندیغك مدتجه نفسك تحصیلدار کبیدر .
سندده آنك حسابنه مأمور مسئولسك . تحصیلدارك
حسابنی کورمز ایسهك بالآخره حساب و مسئولیت سکا
توجه ایدر . بنهء علیه فرصت فوت اولمزدن اول انکله

حسابلاش، زیرا شمدی بویله یایمز ایسهك روز وجدان
سوز حسابده سنکله برابر بولنمشجه سنه بیلیرمکه . فریاد
واستمداده باشلایه جقسك . اما بر محیب و مد درس
بوله میه جقسك . یالکز جانب فرمانفرمای قهار مطلقدن
(اقرأ کتابك کفی بنفسك اليوم عليك حسیبا) خطاب
ازلیسنی و (بز عظیم الشان سزیه رسل عظام بعث وارسال
ایتمدکی . طوغری یوللری کوسترمدکی . صباح اخشام بزی
ذکرو تسبیح ایتمکی امر ایتمدکی) و بواوامر الهیه مزی
اجرا ایچون لیل و نهاردن سکا وقت مساعد ویرمدکی)
عتاب لم یزلیسنی، طویه جقسك . ایش اوپره سهیه کلد کدنصکره
ندامت و پشیمانی فائده ویرمز . نفسکی محاسبهیه چکمکده
تاخر و تسویف ایدیورسهك بیلکه کشف الحجاب
و مطرود عن البابسك او حالده نه یاپه جغکی بیلورمیسك ؟
افراد آفریده دن هیچ بر فرد ایچون اندن بشقه مرجع
استمداد بولنمیان او باب رحمتی یانوب یاقیله رق چال، و کشف
حجاب کشفته چالش . بودنیاده سنی محاسبه دن ورب
کریمکی تذکر و مراقبه دن منع ایدم بیله چك شی اوج

آفتدن عبارتدر . بری تمادی غفلات . دیگری وساوس
وهواجس نفسانیه دن جستجوی لذات . اوچنجیسی
ملاحظه عادات ومألوفاتدر . ایسته بو اوچ آفتدن تحفظ
واجتناب ایدن کیمسه ان شاء الله الرحمن ایکی عالمده مظهر
نجات وسلامت اولور والسلام ختام وصلى الله على سيدنا
ومولانا محمد وعلى آله بكل لسان فى كل حال ومقام .

فیاتی یوز باره در